





紫栢老人集卷之十五

歌

願僧歌

憨山德清閱



君不見大塊內大塊外凡屬有形皆聚沫風卷滄溟  
徹底枯皮既不存毛奚賴今與古知幾代搜剔興亡  
多感慨鏡裏豪華草上霜日出浮光竟安在大道喪  
仁義起愚智遑遑分彼此七雄五伯殺氣驕楚狂悲  
鳳譏孔子李伯陽爾胡爲去華取實亦支離欲返真  
淳盤古心時人未必解相隨窮百家討衆論傍門駢



戶增迷悶精閑文武戰功名究竟空餘千載恨自秦  
來不可說力并山河流杵血雖然美惡不同觀到頭  
名分慙先列干算計萬思量古往今來夢一場寒暑  
相推毛易白爭如削髮禮空王空王業貴人紹生死  
中流施櫓棹有緣拍手便登船一念不生等麤妙死  
井水豈藏龍巨靈一撥泥沙通百千三昧總心源橫  
拈豎弄振家風有等人眼睜睜欲心如火覓長生誰  
知生是死之媒媒在終難藥物成縱成得必有壞有  
壞修之非所解少年自笑學飛昇一段風騷幾爲賣  
多算勝少算敗算來算去爲僧快五蘊身心水卽波

聖凡坐斷無罣礙一瓶一鉢海山寬雲行鳥飛恣歌  
與願爲僧願爲僧世世生生繼祖燈四弘爲轂法爲  
輪碾斷衆生愛與憎杜鴻漸王欽若生願爲僧死相  
約不榮國相貴爲僧達者自知解與縛青山曲碧水  
灣松竹風來益道顏相逢若問爲僧事須信爲僧非  
等閒

### 喚鳥歌

道人天放度浮生城市山林信脚行除却着衣并喫  
飯眼前無事可留情雲邊松松下石枕錫橫眠消白  
日從他花鳥報年光鼻息如雷睡正密忽醒來持鉢



鉢狂譎出谷真快活望烟乞食向前村一飽那分精  
與糲風塵中境界別憎愛紛紛難了絕輸與心空及  
第人遇緣好醜何煩熱知不知漫自癡蕭梁陳迹草  
萋萋兩輪日月如丸擲竹馬兒童髯已絲貧與賤富  
與貴冷眼看來無面背狂奴自是賣高名平等光中  
生忌諱簑衣不着着羊表七里灘頭成浪費這段光  
見不見日用堂堂同掣電直饒師曠與離婁竭盡聰  
明隔一線訪道易悟道難相逢幾個委心肝些兒拂  
意便生嗔神珠肯把與君看得此珠大事了我本不  
生誰復老流水聲中唱哩囉斜陽影裡喚歸鳥罷罷

罷及早休干峰古木足清幽莫待飛高勅始下羽毛  
零落道難修

弔開先湖月鑑公種樹歌

君不見開先老僧號湖月羅公見之不敢忽贈之湖  
月非無取清明在躬體外拙湖上山月邊窟朝暮往  
來行不歇見人斫樹卽哀號跪拜其前求莫伐毫末  
全抱霄壤然損我一枝拔我髮君欲伐者便一時老  
僧視之如斫骨願君頓發菩提心留與禪林壯門闕  
夏月遊人夾道涼冬來風雪難埋沒更有神飈天外  
來樹響泉聲當面咄男兒咄面解翻身凡聖情塵障



示覺暗居士歌

去年花落開今年今年花落開明年花開花落知幾  
回有誰能究未生前未生前痛究竟死生憎愛登時  
淨覺花開遍菩提樹香滿十虛耳根領

病病歌

五行四大是何物解寒熱兮解生克風寒水濕互交  
馳情根未拔遭渠惑遭渠惑幾度尋渠渾不得一片  
虛明礙口門千言萬語吐不出馬駒兒日面佛月面  
佛洞山暗裏同軌則看他有分有誰知拈轉頑心赤  
骨立赤骨立從教五眼難窺識却許狸奴白牯流寒

熱鑪中間跳躑君不見桃花紅李花白纔得春光便  
增色昨夜東風過短墻朝來滿地空狼藉眼前榮能  
有幾二鼠侵藤墜復起等閒鏡裏髮毛斑報道當人  
死消息死消息我若無生媒不入這些病痛向誰言  
多少男兒甘自忽甘自忽鐵面閻君解羅織三途一  
報劫五千出得頭來終費力又不見高張富貴震天  
地頭白黃金買不去南山北嶺塚纍纍見說蓬蒿穿  
眼裡憨憨子能病病夢中拾箇破沙盆醒來却是談  
禪柄曲折松枝隨手應天風偏向手中吹霹靂一聲  
頭却聳



桃花歌

君不見桃花開桃花落開時何芳穠落時何寂寞誰  
知本無殊人情有豐約南青阡東紫陌無限桃紅與  
李白玉樓人醉喚不醒夢裏南柯郡政積不知何處  
曉鶯啼醒來紅日懸天碧追思枕上榮辱事兔角龜  
毛爭仲伯古與今休與戚動靜一條橫喧寂堯舜巢  
由鏡裏花春深風雨閒吹笛牧童豈有悲歡心有  
聽之心如摘桃花開桃花落開落恣無常道人臥巖  
壑壑之上巖之東偏多翠栢與蒼松長風忽然遊太  
虛雲濤滾滾鳴千峰耳根無何聲洗脫我乃喪我我  
無踪無踪是我我是誰斜陽西去自鳴鐘鐘中鼓聲  
如可雜曉來何以破昏蒙桃花落桃花紅分別情空  
代謝同我是如來真骨肉肯將妄語誑寰中

示如印觀身歌

君不見如花女子誰不戀只緣面嫩怕風吹幾回躲  
避桃花畔又不見吳王樓船載西施蕩漾中流銜顏  
色一朝越兵過行春等閒笑裡姑蘇失這肉塊害殺  
人古今無限沒風塵老僧有箇降魔術不是英雄不  
解識常將此心觀此身此身畢竟是何物今日觀明  
日察內外搜求沒搭殺皮裹肉肉包骨橫筋豎絡五



相織三焦五臟細復推螻蚋以爲極樂國膿爲漿糞  
爲食終日醺醺自爲得一朝報盡幻軀燒總隨烟焰  
風飄失能觀者是我心所觀者是我身能所何曾有  
疏親譬如吳越各江山癡人無智認爲一觀之久觀  
力漸熟成抖擻一道神光照厠坑蛆蟲滾滾希延壽  
臭穢中不堪處爭名奪利誰思止萬兩黃金買粉頭  
直謂風流長不死悲哉業鬼與媼妖不道東風夜半  
生猶謂春光常若此

紙襖歌

君不見天上六銖衣人間宮錦袍纖柔交錯固無比

爭若溪簾道味高西風起誰不怕凜凜侵人如箭射  
寂寞千巖披坐時恣爾寒雲覆房瓦夜將半窻月白  
侍者莫能辨青赤誤認霜猿擾余禪驀地當頭打一  
策曲兮曲直兮直凡聖情忘難可測化母機梭織不  
成那堪羅綺較顏色行着輕坐着燻坐臥相應便舒  
卷八風一任作風濤道人豈改菩薩面挂松枝晒屋  
角穿窬見之亦不捉隆冬獨壯老僧懷一片虛明謾  
描邈又不見紙衣道者亦奇特生死去來何自在却  
被曹山痛斥之念異便與玄體昧中峰老亦紙襖橫  
拈豎弄無不好卽衣說法聲如雷自是聾人耳昏耗



比年來俗愈薄狐兔成羣亂穿鑿柳絮蘆花翳眼睛  
解脫光明甘束縛紫栢生見弗忍逆卽逆今順卽順  
夜叉菩薩面無常刦化癡郎悟心印也不管你青州  
衫重七斤也不管你溪藤襖無四兩一條性命等微  
塵賞卽罰今罰卽賞

悼徐文卿太僕

避暑何須萬峰去虛堂寂寂多山趣飄風驟雨須臾  
過燬脊瓦溝流泉注萬壑千岩孰卷來等閒却向城  
中開秋雷轟轟鳴法鼓無限勞生夢裡回君不見開  
門綠自到望處紅如妝卽色知非相風塵蓮萼香不

數日徐彥文匆匆束裝朝聖君訃音一旦聞意外空  
解未深淚繽紛前船便是後船眼莫道他死我不管  
驀地臨到我頭上電光石火徒悲歎隨順無明起諸  
有英雄百戰爭好醜若不隨順諸有離佛手何曾異  
我手

觀牡丹念來慈

未花主人何處去正花猶自不歸來倘然一夜風雨  
生可憐艷冶點蒼苔君不見富貴貧賤本一條花開  
花落徒嘈嘈槎芽未發試着眼搖落孤根煖獨饒

鞭鏡歌



君不見桃李華鮮且軟紅  
白枝枝風未捲公子停鞭  
勒馬看等閒一片飄清淺  
河邊水去不返可惜朱顏  
日漸損從教把鏡玩髑髏  
笑殺癡心生繾綣又不見  
潘安宋玉貌最美一息不來成棄委  
青銅知道落落誰家不照兒郎照婆子

### 山居歌

達觀顛達觀顛衆人所愛渠弗憐  
鬧裏抽身委躁君疎狂一味樂  
林泉撩起行未甚錯鼻孔孤危不受索  
世路崎嶇行道難算來肥遁是高着  
大率進莫若退行藏慎密終無累  
糞衣懷寶寧負癡人不知我我則

貴住深山敢偷安火種刀耕度歲寒  
飯訖虛窓禮佛書幾回明月借光看  
置殘卷雙足斂水韻松聲耳不攬  
一塊圓明忽現前瞥爾生心卽不見  
眼中釘腦後楔不是輪扁難出脫  
相應約莫徐疾間放過依然成兩楸  
無手人解行拳輕輕擊破趙州關  
五家祖印落掌握生殺縱橫豈等閒  
羅緱嶺石孤硬鳥道懸空常寂靜  
萬壑千巖一線通龍泉幽邃多潭洞  
可棲身可滌心覺路蕭蕭缺嗣音  
狐兔成羣白日嗥夕陽碧殿下  
秋陰君不見屈步蟲卽屈卽伸難  
大用蒼虬一蟄邁三冬出水雲雷  
自相送烟霞趣莫謾舉古往今來



挹巢許衡山懶瓚枕流眠丹詔連徵不解起這家風  
勿外通若將此意透王公管取當頭失高貴涕唾功  
名學苦空

梵川問月攜麟郎覺生

吾問天邊月可曾有離別燕山與吳門幾見月圓缺  
或復海上生有時林間沒光輝在隱顯肯爲迷雲汨  
君不見長安道傍蕭寺中焚香露坐月當空昨宵十  
八高人聚風月無邊爾復從又不見不傳之妙亂拋  
擲滿地珍珠誰拾得此情難借虛空喻摧破虛空須  
着力

清涼寺雙栢歌

君不見古清涼伯仲干霄知幾霜窓前倏忽神飈生  
翠濤吼喚寒焦腸此時趣誰領略積刼情塵俱廓落  
堂堂一片舊靈臺塞破虛空無處着好家風謾從聾  
浮生如夢夢如空今昔豪華鏡裏狂勸君莫負主人  
公淮陰功留侯策究竟都來閒費力三月桃花雨後  
看殘紅滿地悲狼籍大將軍五大夫榮名無故落江  
湖爭似清源堤下栢難兄難弟世中無又不見鸞鳳  
高去去來來愛此巢香葉玲瓏韻獨奇靜聽水滌  
心苗俗漸薄真可哀幾人癡想製棺材金郭玉廓終



須壞木板安能保久埋勿短見取勢便呼奴喝隸逞  
好漢直謂青天亦可欺青天較汝更會算大張羅任  
他鑽到頭一一結公案何如當年卽回光留取清陰  
後人感

示張春堂

丹衷雲外尋知己赤脚塵中覓信心二十年來霜雪  
苦寸腸愁絕爲誰吟爲誰吟吳門風月最知音知音  
不在念生後一道神光貫古今聞我行惠雙履萬里  
烟雲生足底烟雲總是相知心去去懷君寧有已寧  
有已瞥爾生情早不親願君護念常如死死人坐斷  
攀緣時槁木寒灰未足比猛然大地回春光頭頭處  
處皆芳紫信手拈來總藥經問君何處留經註唯願  
龍神常護持普與衆生作良劑

姜節婦歌

項羽強猛誰敢並恣暴縱火燒咸陽烟燄亘天三百  
日視之談笑畧不傷想必肚腸生鐵鑄又同木石無  
情思及別虞姬便動情歌罷傷心淚如雨又不見漢  
高大度天下聞抱病呻吟欲斷魂戚姬難舍死不顧  
撫床相視淚紛紛這兩漢氣吞當世真罕見羅絡英  
雄如小兒使貴卽貴賤卽賤觸着虞姬與戚姬不殊



生鐵遭火煨方圓曲直任鉗鎚又如蘧條任舒卷楚  
霸王漢高祖大度強猛何足數愛欲關頭皆受降臨  
歿戀戀猶相顧反不如嘉禾城東姜氏女亾夫節抱  
金石固彈指高樓五十年不異羈旅寓日暮又如枯  
木倚寒岩春光荏苒心如歿唯有清貞不變常遺風  
永永鎮頽世

遊善卷洞

性僻平生愛泉石天下山川遍曾歷搜奇討異幾經  
秋佛窟仙源靡不識靡不識善卷幽靈更殊特香藹  
崆峒別一天雕巖刻岫綵雲烟石田丹竈尚依然仙

人一去不復還人物森森儼若生遊人把翫何多情  
造物變幻固難測以道究之亦可自是遊人不悟  
心却于心外生情執生情執隨境遷流何日息此心  
明曠本無涯昧之無故生欣戚臨泉坐石便歡然把  
酒高歌自比仙須臾興盡復塵勞一段幽懷變縈纏  
何如直悟本有心信手握土總成金大地都來一隻  
眼不知何處可安針若有一針可容得此心之外必  
有物有物安能無愛憎愛憎旣起迷真識吾之愛山  
水從來不斷此踏遍名山不着塵看盡江山又何色  
撩天鼻孔任昂藏去住無非無有鄉不知誰薦此中



青國山寺裏禮空王空王禮畢出法堂千峰迴合已  
殘陽扁舟縹緲向何處夜泊烟波萬里長

汝堅歌贈項子

有形堅久惟天地水火風災終飄沒此乃如來真實  
言不是等閒相誑惑天地間事雖多升沉光景暗消  
磨一一已過不復計榮辱牽人情不枯情不枯逢春  
歡喜遇秋悲古往今來皆若斯不思天地不長久但  
見所欲皆可守天地數窮尚傾頽須臾榮辱我何有  
春花雖媚終必凋容顏雖好終必憔悴君不見偷桃曼  
倩頭解白寒暑催年不可逃可逃惟有一着子天地

有壞他不死不在深雲遠壑求不離現前日用處穿  
衣喫飯莫放過生心早是路頭錯一路光明變識情  
改頭換面由渠作瞥然悟識情卽是金剛座一切萬  
物屬生滅惟有此座常堅固不是英靈大丈夫阿誰  
占之得安妥得安妥汝字汝堅不虛度我歌信口不  
思量傍人讀之笑我狂惟有汝堅信不疑晨昏吟咏  
遣時光遣時光春花爛熳香何處不用鼻嘗用口嘗  
白衲歌爲馮開之作

此色不異奔茶梨來往風塵不染泥願君此心如此  
色一點孤明常歷歷又同日月破幽宵昇沉宇宙無



踪蹟此衣披之不顛倒願君此身常皎皎朔風吹雪  
天不寒又作蒼生黃綿襖此衣又同青山雲卷舒自  
在爲甘霖一切枯槁被恩澤無情亦生懽喜心與君  
聚首不甚久知君心地少塵垢臨別遺君此衲頭願  
君精神常抖擻耳根如鐵捲不轉相逢依舊春風臉  
黑白叢中標格奇魔外望之心膽戰我去矣君須記  
雲影天光總我情閒朝靜夜休相憶休相憶絕情識  
一點孤明常歷歷此色不異奔茶黎願君此心如此  
色呵呵呵呵咄咄咄到頭光景何消息白白白黑黑黑  
君之脉

懶瓚歌贈曾金簡

我聞君家住衡岳出入常隨猿與鶴消閒更解弄潺  
湲絕勝風塵爭奕博又聞衡岳有懶瓚只會穿衣并  
喫飯衆生苦海正浮沉隈藏岩畔渾不管丈夫兒旣  
出世不爲衆生作何事焦芽敗種非大根唯堪打殺  
餒狗子普天之下皆王土汝獨潛心态懶惰假使天  
下都學汝衆生淪墜復誰度懶病不除害非淺此風  
從今不可扇君不見天子懶惰社稷亾丈夫懶惰家  
不昌農夫懶惰致餓死蠶婦懶惰蠶必僵汝這漢沒  
思算專以習懶爲慣便懶病旣成無藥醫平生一事



無所辨汝不聞如來呵懶爲毒蛇昏蔽靈臺苦無涯  
頭出頭沒生死中幾能得覩優曇花君旣歸懶瓚想  
必舊相知爲我殷勤致此說從今勿以懶爲辭聞此  
說仍不改猶復松蘿貪自在與我一拳打殺伊敢保  
長劫無罪債只恐君力量小反被懶瓚到打倒一場  
敗闕天下聞惹得兒孫聚口笑

子房山歌

彭城山上雲彭城山水聚散及浮沉人代迭終始  
君不見人生大塊能幾何黃河東逝無回波豪華過  
眼曉天霜誰能百戰爭山河楚漢雌雄一夢勞其餘

蹄涔安足多世謂先生見幾蚤侯印棄之如腐草超  
然故托赤松遊到頭那得韓彭惱此據先生跡安知  
先生心先生在報韓功名非所忻秦亡心事了不去  
何沉吟又不見功名長生不相遠棄彼取此識亦淺  
我知先生天機深刀圭羽翰都非戀因登古寺賦此  
歌偶將墨跡洒烟蘿先生莫笑太多事男兒志氣情  
難磨難磨若是蒼蒼岫河遷谷變無定軌惟有先生  
一片心恒與茲山增秀美

龍蛇歌

君不見龍與蛇本無常龍若有欲卽爲蛇蛇能無欲



鱗蟲王世人所欲固雖多飲食男女爲六疴若以飲食較男女男女又爲欲之戈漢高祖之大度楚霸王之強悍一火咸陽心不悲虞姬別時情何軟淮陰功高尚忍誅戚姬臨決苦躊躇能將欲海輕掀倒自古人間幾丈夫西施不知是何物傾城傾國無多力當時若使留于越越霸諸侯亦未必又不見五百仙人善馭雲去來空際盡超羣纔聽宮女一聲曲神力俱遭欲火焚蘇子卿持漢節吞瓊噉雪命欲絕死生朝夕不可保胡婦生兒猶所悅欲之難斷有若是難斷能斷須男子男子斷欲尚多難婦人失節何足耻言雖反意甚切字字分明心吐血是男是女能斷欲誠爲世上真豪傑扶人倫整世道苟非豪傑寧堪造饒有周公伊尹才未能斷欲終顛倒大可笑大可笑好漢多迷尿屎竅臭皮袋上巧莊嚴相看莫不稱爲妙殊不知四大合成身四蘊攢爲心若以四四觀身心何處尋煩惱海豈有邊龍蛇出没足雲烟人欲關頭雷雨深等閒換骨阿誰先

舊路嶺龍泉寺普同塔歌

君不見見隆興東龍泉西稜層窄堵倚雲霓山高靈骨鱗蟲長地發琳瑯鸞鳳棲老別傳願行堅峨眉補怛



咸周旋戒珠圓潔光飲日興福十萬并八千了此心  
非一生十方三世時精誠誰料髑髏無着處清涼山  
裏伴緇英金閣嶺亦曾住再來矢願立標幟可憐一  
片好心腸深郎徒剖驢肝肺照法師涅槃義皮肉相  
連無斷際生公盡道是前身來往白雲知幾祀臨終  
時顯大機講堂端坐稱阿彌十氣未殘神獨逝蓮花  
國裡誕嬰兒義禪客實難得天生一段混沌質無論  
早晚話頭勤採藥林間忽禪寂紅日暮不知歸虎豹  
羣中身正遺兒孫滿望阿爹還燈燭相尋鳥道迷古  
澗邊定松烟癡兒一見叫蒼天如何連日不歸家却

向深林伴虎眠既喚醒忘所證猶道須臾無片頃爾  
曹無故惱老僧好場瞌睡多破靜這三老誰解表輸  
與皮球間炒鬧家醜翻騰無剩留浩浩聲光千古調  
齊一變至於魯魯一變至於道從粗至精成風教花  
落花開不記春年年黑白來祭掃此道場初起難數  
畚血戰清寒巖鎗疤刀口誰知痛會首當年命幾拚  
助戰者老與少僧俗橫死真可悼而今大眾得安然  
饑餐渴飲皆溫飽如是恩莫忘却舉首虛空有菩薩  
行藏好友渠盡知勸君莫爲沒傷僮我作歌意甚美  
但恐吾曹忘所始始忘本折枝葉衰前人辛苦成何



事話到此肝膽裂知恩報恩須豪傑春來寺外桃花  
開前後殘紅亡者血

弔子陵嚴先生 并序

自洗飲風微至馬上得天下之雄而功利智勇波  
震塵飛君臣交猜朝富貴夕誅夷然趨之者猶如  
夜蛾之投燄哀哉及先生足加帝腹恥纓紉而激  
清颺延至李膺范滂之徒不以歿生易義槩桐江  
一絲之餘烈也今幸過祠下因寄短章一弔先生

吟曰

三召今不能榮先生一退今不能高先生榮高既外

今則先生不可得而名唯山高水長今一瞻先生之  
眉宇悵然而行

銅犢歌

愍公遺在龍門者

扶桑之西墨水之東勞盛凌厲海色朦朧奇岩異壑  
曲澗巨峰烟雲深處驚濤振空中有美人寂默禪宮  
予曾扣關如桴擊鐘不慮而酬卽問而通見斯蒼犢  
背負仙翁展卷勿收意托冲融神遊混茫之初跡符  
旣判之後長者緒言久承下風覩物思人真懷忡忡  
上方山夜坐懷孫仲來

明月在青天流泉在碧山素輝與寒響靜聽有無間



我有所思兮美人紛未還時陰固難待奄忽鬢毛斑  
結屋松蘿深况連清溪灣輕舟飄白波漁父多軟頑  
既去仍復來華鱗得非艱欣然換濁酒一醉忘萬般  
拍手喚不醒遊魂江海間風濤未可測彼岸宜早攀  
警世

嗟哉世間人所計何其短但欲遂目前終古竟不啻  
形骸有敗壞真光常自在不滅必受生生必酬業債  
今生弗如意前因所招待貴賤雖有殊業鏡寧假借  
形端影必佳面惡形必恠少年如春花既鮮豈不萎  
常將萎事看安俟零落悟

### 哀靈岩寺僧歌

莫謂出家好山居絕閒擾年來苦更多開口向誰道  
山地枯山田瘦枯瘦豐收能幾斗往來賓客强支持  
分外徵求何所有况復三年兩度荒每日吞饑如餓  
狗說到此淚如雨莫若離山托鉢去翻思佛祖舊叢  
林難將一旦委荒楚君不見靈岩寺大小禪房皆廢  
棄老僧乞食未歸來白骨不知葬何地流泉聲難可  
聽誰謂靈岩四絕英松風今作斷腸吟木偶聞之亦  
淚零

### 悼棲霞素庵節公

并引



師之所得以無得爲得所以處失而未始失也以  
其未始失故凡莊嚴淨土崇麗緇林者觸願而成  
雖雲山可磨岷江可竭師之德容充如也一日棄  
我而逝寧無悲乎故以辭悼之辭曰

師來兮以慈悲爲釣師逝兮而性命合妙青山兮師  
骨流水兮師笑余痛哭今垂照法梁折兮孰肖鄙詞  
瓣香兮一弔

### 登方山歌

君不見晉陽方山李長者夔虎馱經不用馬大賢村  
頭高山奴一見至人便能下嗟哉世道衰斯文竟成

假空間冠蓋名已乏舊風雅馬家古佛堂土室久荒  
涼長者去不返佛日誰洗光慚小子生何晚雙林那  
堪紹緇袞見賢思齊非憚勞尋山問水叩玄闡我曾  
聞華嚴經十方如來之典刑四重法界難思議孰能  
揮毫無留停譬百川爭赴海萬里雲濤煥文彩又如  
春光在萬物洪纖濃淡皆自在理法界喻夫水水結  
爲冰事相似互成互奪等屈伸千舒萬卷不離指最  
難悟後一種事事無拘非襍駝輸與文殊阿逸多當  
陽頌出價增重懷州牛嘉州象張三吃草李四脹更  
兼空手把鋤頭明暗相叅呈伎倆日用中露形容合



毫臨紙何匆匆星霜五易論告成世傳天女俱騰空  
又聞長者初來時囊挈經書歷險危風霜一夕震林  
谷老松拔去泉如飴至今巖僧仰饑渴聖師厚德寧  
忘之達觀憨出苔龕蚤春結伴下寒嵐芒屨踏破幾  
層雪神福山原試一叅廣眉朗目躡上峰丹唇紫臉  
髯不同身長七尺有二寸天開法海真英雄殷勤再  
拜不忍別行行回首烟雲重

式廬歌

有序

我聞太極老人乍夢之後而兩儀始行自是特立  
環立於大塊間者惟山焉耳震旦中祖崑崙高三

峨尊五嶽奇傑牢盛神異蓬萊今有易崑崙退三  
峨隱五嶽進匡廬而獨式焉者蓋匡廬之山清深  
憨秀故也清則離垢獨立深則幽討莫測憨則近  
厚秀則遠媚若人取之有以哉憨憨子聞而爲之  
歌曰  
清兮本無染兮深兮難討測兮憨兮且有容兮秀兮  
遠媚兮奚獨全此四德兮予其望之厚兮

澄公泉歌

君不見高山岩曲有流水烟鎖雲藏人不覩白足窮  
幽偶識之倚杖徘徊不忍去泉泉泉何其玄儼若欲



語聲弗全又不見伯夷清巢父潔若喻此泉難我恆  
澄公講餘來彈舌蒼虬作雨潤枯渴令人長憶胥靡  
君泥塗板築龍蛇穴

### 江水歌

江水忽起兮江水忽伏兮起兮伏兮是誰所使兮心  
水本澄忽然怒生怒既爲媒兮所謂喜者不煩介紹  
自然而相賡是事甚易知兮奈何觸事而迷起伏無  
媒風哥作戲蓬蓬然而來寂寂然而去來兮去兮其  
誰之命說者曰有陰陽而後有動靜風兮風兮陰陽  
未判兮廓然昭徹兮此爲渾沌之老敢問此老之先

曰太極無極耳嘻無極之先孰名無極或曰無極之  
後名德始興慙慙子抱膝而歌曰名兮寔兮相互而  
窮兮所謂無極也者太虛塗彩耳喜兮怒兮一心未  
生兮果異果同兮喜怒哀發兮有待無待兮知有無  
者果然真兮果然妄兮有能析兮則江水之起伏富  
兮貴兮貧兮賤兮皆春風中小兒騎竹馬耳知此則  
風之所始在我而不在物矣昔人有偈曰大地山河  
是阿誰了無一法可思惟燈前喜怒哀起倒敢問西  
隣知不知咄夜來處處鳴鐘鼓敲破髑髏人不知

### 燕山送雷雨居士奉使入楚



君不見湘水湘山天下希烟濤空翠交相輝片帆杳  
然向深處掉首方悲人世非賈傳韓生曾去來滿前  
幽勝成思歸好山好水不解賞此道遙知未入微又  
不見懶瓚憨眠石枕頭禪心如水平無休千峰但覺  
芋火暖那知世上有王侯君承王命辭燕山拂拂秋  
風兩鬢斑岷江洞庭遠更闊虎兕魚龍日夕環覺有  
心見有身無端明鏡忽生塵騰今耀古光自在相逢  
幾箇用天真莫道此言淡無味無味之中無限春朱  
陵高久寂寥回鴈峰前荆棘饒狐兔成羣笑復哀驅  
除剪拂金湯勞臨行更勸一杯茗兩行熱淚沾緇袍

再過澹庵居士園有感

勺水何必滄海水慶石何必太山石此石此水意甚  
深白雲碧草誰復識誰復識誰復識見說先生手自  
壘一花一木皆自植吾雖無心來此中恍若先生共  
相揖

皮囊歌

這皮囊無好醜空色從來莫能牖自是當人情未消  
千零百碎分淨垢君不見玄沙老髑髏面前金剛倒  
費盡精神扶不起使人常夜徒悲懊岑大蟲逞家風  
快言業障本來空一朝拶着難伸訴業障依然障不



通兩禪伯心路直血血刀刀無愧色公案分明請試  
觀冷灰豆爆知恩德透此關便不難掉臂縱橫恣軟  
頑但得胸中無夙食從教藥病自般般聖凡情頓坐  
斷不住中流豈兩岸須知死水不藏龍雷電光中看  
胡亂看胡亂看胡亂末上通身出臭汗生殺交加意  
氣閒大底輸他本色漢

送靜庵知客之燕京造佛像歌 有引

靜庵上人將鑄銅爲像一日辭予出山予問此行  
奚爲曰造佛去予曰佛如可造空可青黃若知泥  
佛不度水金佛不度爐乎莫若鑄心爲佛大水稽

天弗能漂劫火洞然弗能燒顧不偉哉焉用範銅  
爲乎上人曰我聞水可以爲水色可以爲空土木  
銅鐵皆可以目得之色乎非乎若然者心無形段  
空無邊際卽空卽心卽心卽空空空兮心兮孰得而  
思議之範銅爲佛有何不可古德有言曰若人識  
得心大地無寸土寸土尚無指何爲銅予曰善哉  
子行矣乃作歌以壯之歌曰

劫火洞然天地灰毘嵐吼擊三禪墮鑄銅爲佛不可  
壞常光千古破昏埃此行秋深時漸寒歸來應是桃  
花殘文殊老人頻相喚夢裏春光與易闌君不見鴈



塔稜層高入雲龍藏稀奇難可聞等閒莫把年光玩  
老病休將口舌分呵呵會得麼剝皮刺血苦何多  
豈是古人無所見行邊早晚細思他

悼無塵開士

沁水諧觀兮不遷遙入潭柘兮獨還白雲忽散兮寧  
堪不遠悼爾兮義完生爲死媒兮奚歡死爲生母兮  
奚難了此而超然兮卽羣動而固間公若有知兮懸  
解於去來之間

紅禪衣歌與開侍者

宛然一片大火聚觸着當下誰不死惟有命根久斷

者披之處處爲標幟又如初八天上月黑白相參難  
辨別朽枯體內解龍吟烏雲重疊清光發莫謂穿舊  
不復美華林曾示裴相國再來非仗觀世音老僧端  
取直壁立君不見烏窠拈起等閒吹侍者當陽便知  
歸陽天和暖披此坐一切回互不回互曹谿少室有  
來由不是知音不點頭或五位或三墮總是衆生寒  
之服殺豬屠戶念彌陀聖凡覲面謾分訴謾分訴銀  
盆盛雪月藏鷺阿誰於此辨端倪木兒石女堪分付  
堪分付不是綾不是布燦爛光明處處露披之安坐  
風雪中不異周圍設鑪火設鑪火點雪投之可見麼



若還不見總顛顛見之無事討事做

寄弔陳內翰良軸

我登廬山時東林訪君子別後不幾年君子取高第  
黃梁夢未全忽聞已棄世花開終必落人生終必死  
花落還復開人死竟不起此情向誰言耒陽有名士  
以人還自驚無常無彼此縱活一百年不過先後耳  
君子君子兮望雲空相思聰明泉不枯聲咽何時已

觀放花炮歌

君不見富貴人所喜貧賤世所厭古往及今來升沈  
寧有限惟有達道人榮辱俱如幻漢高祖楚霸王爭

鋒氣勢何昂藏正眼看來總是空長安彭城俱荒涼  
亞夫塚蕭何墓荆棘深深眠狐兔山河不改勛業盡  
奚必從前多勞苦大不若林間叟寵辱胸中曾不有  
白雲去住本無心泉石城隍恣遊走或愛靜或任喧  
超然直下了非關萬籟寥寥夜月寒何妨花炮芙蓉相  
看聲悅耳色供目聲色叢中誰解悟常光生滅兩俱  
遺千峰寂歷心如谷又不見張相國馮司禮光燄輝  
輝貴無極一朝福盡草頭霜日出何曾睹涓滴古如  
此今如此相逢誰是奇男子聽炮觀花洞世情掛冠  
岩穴尋高士薦大機聞塗毒彈指根塵成石火羽化



還同水夾魚陽回大地俱懣懣學無生卽無死生死  
從來互相起生若無生死亦無孤明歷歷照千古要  
會得須豪傑一切情頭都斷絕譬如香象脫羈鎖縱  
橫不受人牽拽人聽炮我亦聽人觀花我亦觀就中  
別自有玄端妍醜交加慧鑑前片心湛湛喻寒潭寒  
潭水清徹底富貴貧賤如泡翳碌碌有何期輪  
吾枕石和雲睡

病中歌 有序

毬道人以四國王相勝負而未調或以火攻或  
以土遏水風二帥復激而鼓之大戰不休是以陰  
陽弗和結爲寒涎病求醫於盧扁賈術於華陀皆  
爲之縮手且曰此病根於混沌之初發於太極之  
後證自而相須有識而致之非我曹可以療也皮  
毬道人側聞而笑之遂發而爲歌

毬道人抱痰火咳嗽寒涎朝暮吐四大相凌未易  
調一呼一吸無常主達此理真快活謾言天地爲棺  
槨此是莊周夢裡談無生路上渠難摸旣無生寧有  
死一切屈伸皆幻耳乾坤亦是臭皮囊囊中濃滴奚  
相惜千萬劫如一瞬南嶽關門何太鈍由心造業業  
生災勞頓儂家失本分君不見一念不生佛亦幻旣



生有覺覺生情常寂光中受磨難離圓覺無六道廢  
六道無三乘增減關頭理不明醫王設藥聊蕩洗皮  
毬道人一身輕一身輕健如狗衛主饒饒不歇口相  
逢誰悉片肝腸濕草功勛亦曾有罷罷罷變毛骨曼  
殊大士騎未足於今只上峨眉山象王隊裡超拳拳  
又不見遺二道人最相愛燈前爲我償筆債一行兩  
行寫病單皮毬道人常不壞常不壞太自在房山深  
處覓春光巨桃易杏誰偷賣孫郎藥貴近來風飄零  
鮮萼無人曬身旣爾物亦同痰火機關萬法通造化  
莫噴漏真訣誰家園裡杏非紅

憨郎撓柴歌

撓柴好撓柴強古人標格誰敢忘無分老少與賢愚  
一聲梆響下禪床下禪床看轉變歛忽更頭并換臉  
人人圍片破篋肩翩翩隨衆出門遠一步高一步低  
孤懸鳥道路蹺蹺風團冷氣攻心腹日照水凌滑似  
泥到雲深稍停息天寒地凍難久立揀得枯株竊喜  
輕誰知雨打中心濕撞着了重也罷安上肩頭逐步  
下高坡峻嶺轉折煩幾迴蹉脚心驚怕不做過寧  
知苦往往偷安恣懶惰直待親身經一番從今去後  
知回互喫熱飯睡暖坑也要回光暗自想大家若不



其勤勞安能有此清福享撓柴強撓柴好居山莫要  
閒炒鬧衲僧既欲煉昏沉撓塊柴兒勿生惱

與開侍者

龍泉侍者名道開白雲飛去又飛回山深迢遞勞去  
來蕭蕭祖道生塵埃羊蹄馬跡遍蒼苔優曇枯悴不  
復開幾番搔首憶黃梅輪推斲出梁棟材竭力晚季  
支傾頽犒汝特賜茶七杯

子房山漫歌

重前

彭城山上雲彭城山水聚散及浮沈廢興不可數  
君不見人生天地能幾何黃河東逝無回波豪華過

眼曉天霜誰能百戰爭山河楚漢雄雌 夢勞其餘  
蹄涔安足多世謂先生見機蚤侯印棄之如腐草超  
然故託赤松遊到頭那得韓彭惱此據先生迹安知  
先生心先生在報韓功名非所欣秦亡心事了不去  
何沈吟又不見功名長生不相遠棄彼取此識亦淺  
我知先生天機清登仙冲舉皆無戀因登此山作此  
歌偶將墨跡灑烟蘿先生聞之謂我何男兒意氣情  
難磨難磨惟是山與水河遷谷變無定軌惟有先生  
一片心恒與茲山增秀美

弔虛白師



我正生兮五蘊本空師方滅兮一真無待本空則生  
而無生無待則滅而非滅生而無生師不異我滅而  
非滅我不異師師我窮極炎鑪雪飛此中有旨誰復  
提撕我今哭師非悲之悲師其有靈鑒我寸思

燕遷壘避佛歌

余寓傳侍御之紺圃以時事多感又見其俗尚強  
喜誇詐殺伐故淹留日深冀以化之一日禮佛聞  
嗚嗚聲視之則見梁燕巢佛頂者遷壘于偏掖矣  
余不覺法然蓋余挂錫幾三月此方疑信朝暮無  
常燕乃知罪福避佛遷巢則佐我化多矣豈羽蟲

之欲累輕而靈隙猶存不若人心凶昧本心蔽盡  
歟因悲慨作歌

誰謂羽蟲愚羽蟲人不如年年壘巢當正梁今歲自  
遷偏掖居大爲主人供聖像竊恐糞穢罪難除細思  
想誠可悲飛鳴之類何知機人乃最靈萬物首腥臊  
唐突入禪期我重此燕異常鳥形雖昧略信三寶倘  
爾聞經悟自心羽蟲可作慈悲棹慈悲棹紅日落幾  
回渡頭待行客無明浪裏作津梁始信羽蟲人不若  
來紺圃讀此歌歌中滋味苦心多莫謂喃喃口海濤  
急要人人出愛河這段緣非無端只因燕子成此篇



由是觀之鳥我師師恩師德敢不傳

蘆芽山閱法華論懷開侍者

君不見北帝震怒寒飈生蒼雲彤霧馳太清木榻林  
扉睡起時出門一片瓊瑤明懷美人鬱幽思策杖孤  
遊飄泊子地凍山水草木強猷踪鳥跡渾莫視明窓  
下法華論焚香坐閱陶所悶紙勞字故念初澄非思  
量處牛眠穩寂滅體光明腰三周九喻皆皮毛相逢  
若問渠頭角萬壑千岩雪徑遙纔眨眼卽不見行步  
如風又如電惱殺揚鞭喚不回熊窩豹窟多坑塹荆  
棘林煩惱域憎愛交加埋自己蘆芽清勝異風塵早

晚歸來眠露地歸來兮勿帶伴火宅衆生心路險同  
床合被尚相猜何況烟霞沒量漢沒量漢兮閒不徹  
冷看侯王營黑業至死不聞知見香茫茫苦海何時  
竭又不見生天上猶有墜人間富貴能幾日春花雖  
好豈常鮮到頭零落風雨急夫差驕句踐辱臥薪嘗  
膽勤報復只今吳越舊山河年年惟見芳草綠爭如  
七軸妙蓮花深雲淨室頻翻讀頻翻讀兮塵習斷靈  
山一會曾不散凡聖交叅趕鬧場拈華微笑頭陀慣  
如是相無委曲和盤托出寧掩覆自是衆生情見深  
醍醐上味翻成毒開侍者頗可惱杖屨翩翩何處倒



齊魯風高落木寒。長更那得黃綿襖。好歸來聽此經  
簷前共看天花落。

湛綠亭歌

有序

昔人有以利爲病者。則重名以藥之。病名則藥以  
重生。病生則藥以重忘。殊不知利不自利。名不自  
名。生不自生。忘不自忘。皆相待而有也。故白黑紅  
綠。初非有色。而或者色之。豈非忘湛醉綠歟。紫栢  
先生偕二三子。問狄生疾於湛綠亭。覺非子進曰。  
大師來不一發藥乎。先生舍然大笑曰。紅綠白黑。  
聲聲色色。乃至飲食男女。萬物精粗。如冥湛而不

昧綠孰非良藥。覺非曰。若然者。奚不曰湛六而曰  
湛綠。先生曰。書不盡言。言不盡意。聖人設象以盡  
意。耶夫象者似也。故綠卽六也。九方臯之相馬。畧  
其玄黃。取其神駿。今子膠之乎。玄黃則所謂神駿  
者。隱矣。歌曰

湛兮綠兮雄兮雌兮苟非其人兮豈易同歸介然有  
知兮則屬妄想槁然無知兮則倫木石復揣摩兮愈  
得愈失非開郎兮孰能辨析

茅山歌送思燈還松陵

有序

吳江丁生幼業儒屢試不第遂棄去問津無生旣



而將祝髮其子求父得之雲陽號咷白父曰兒雖  
家貧餽粥可供何忍棄故土去異鄉丁生舍然大  
笑曰三界以名言爲體名言以因緣變而有浮生  
於因緣變中變態萬狀子也父也親也疎也榮也  
辱也歿也生也辟如龜毛繩兔角杖繫風挑月豈  
可以泥哉小子行矣無悞乃翁大事紫栢先生壯  
丁生之言哀其子之誠孝贈之以茅山吟

吳江江上月此夕照茅山茅山山上雲送汝吳江還  
人生乃小夢逆順徒悲歡試觀心未生何缺復何完  
茅山雲吳江月父子恩情卒難割卒難割到頭恩愛  
終有歇君不見五世後慶不賀喪不弔使汝由之不  
爲道霜毛頃刻隨刀空昨夜頭痛長五峰得道歸來  
撐渡船兼載冤親無我中

佛香庵夜坐

今夜佛香庵前坐明朝瀨陽江上別今夜月明照坐  
客來宵月明照行役行踪去來故無定月明在處常  
相識常相識犬吠雞鳴報消息月明若使堪把翫海  
上神仙肯蛻骨

壽仲堅尋李生佛歌

人事卒難遂年光不可留是非橫刮掠使我莫自由



豈惟今如此往古恐相伴但若得聞道死生付波流  
何況榮與辱不殊雲空浮君不見豬揩金山金愈光  
小人君子各有長小人懷惡則忘善君子懷善惡必  
忘終來善惡不到處自是君子快活堂一夫快活天  
下安一夫愁戚天下難丹山碧水益道心金釵換酒  
王公寒又不見李彌遜李生佛崇學祠前虎渡橋行  
踪月明猶髣髴山僧本是方外賓竹杖芒屨何所親  
却言遠尋李生佛七閩寧復畏嶙峋

鳳頭歌

并序

道人往年乞食京師諸中貴紛然爭飯道人中有

年少未冠者諺呼爲鳳頭邇來抱病房山而鳳頭  
者又不遠來飯道人則已冠矣嗚呼梵志白首而  
歸隣人謂昔人猶在梵志曉之曰吾猶昔人非昔  
人也隣人皆驚愕其言道人感鳳頭不畏巖谷崎  
嶮敬持主命飯道人於深山遂賦此

昔鳳頭今鳳頭誰云今鳳頭是昔鳳頭來者且未至  
去者不可留來去旣非有眼中見鳳頭嗟哉世上人  
當面昧鳳頭鳳頭復鳳頭橫計如奔流滔滔正莫返  
無風爭覆舟大覺不忍看垂手援癡牛夜光暗投人  
按劍誰非讐嗟哉世上人何人識鳳頭



題淨業堂徹天師卷

經殘老衲無餘事手自窓前拂竹几一卷橫鋪非等閒  
烟濤空翠何窮止君不見斷岸孤村富花卉容顏零落妬山鬼  
又不見一片閒雲度碧空舳艫千里疑街尾浪巨風高帆互飛  
龍鼉出沒如螻蟻看來性命微塵輕弄險收成能有幾半峰上  
石磊磊春去幽枝含蓓蕾彷彿吳姬擬笑時貪觀日暮不知悔前  
王塚後王墳秋雨蕭蕭欲斷魂相逢莫問雌雄事得失還同谷口  
雲今與古柳生肘富貴功名非我有任他造物亂翻騰殷勤抱  
住無生帚鴟與梟鸞與鳳麒麟香

象同一甕長松雪重鶴巢傾誰知打破漁人夢烟霞曲隱龍宮  
鍾梵喧喧震太空聞聲幾箇解入流萬劫根塵當處融運筆端憑  
覺觀念未生時誰所判和盤托出與人看始是英雄豪傑漢咄  
咄勿漏洩落霞孤鶩兩俱絕水色山光一鏡懸通天別有超情訣

靜樂縣萬花山清涼寺歌

君不見萬花深處清涼寺山迴水遶清佳處昔有幽人此練心  
黎羹藿食知幾祀一旦荆棘化樓臺青蓮寶座踞如來等閒忽  
作師子吼魔外妖獸腦裂開哲人既出成草莽狐狼野干鳴如  
雷琳宮金砌臥牛馬



其誰見之弗生哀我愍往者心血枯蒿萊力盡成精  
廬相去未有五百世寧能忍之不扶持又不見布金  
太子芳名久給孤長者隨方有讀我歌信我語便是  
祇園賢檀那慨然出手爲之整兒孫管取多魁渠呵  
呵呵智者誰清涼一念未生時萬花開處六門香若  
人聞之領大機領大機勿生疑業重終難味厭離厭  
離二字聖賢命常人聞之等糠粃唯有英雄調不同  
相逢一見便相期畜生無有厭離心安得爲人秉彜  
倫爲人無有厭離心安得聞道出苦津不厭財被財  
殺不離色被色縛殺縛由來厭離缺諸君欲邁風塵

路洗心厭離是真訣

眉山歌

君不見見眉山高入雲霄際翠靄氤氳三萬里其誰度  
夏清涼深雪飛六月寒侵肌銀鈎掛懶能拭一任垂  
垂壯風骨南衡老漢調不同時可入今時可出顯與  
晦豈有常譬如一手握復張癡人見之有開合了得  
寰中總不妨巴江水龍翻石夢裡徒勞分遠邇何處  
青林鳥忽鳴醒來白象仍師子山中樂聲聞縛大隱  
何須生執着去住閒雲恣卷舒從人笑我無圭角五  
羊皮一釣竿無底盤中弄彈丸浮空落地謾留碍宛



轉橫斜着眼看秋風高暑氣消棧閣岩巒道路遙  
翩瓶錫漢關險二三法侶俱腰包一箇下一箇上松  
畔回頭渾畫樣足倦團團坐樹間滿前黃葉扶清曠  
坐復起過幽曲流水泠泠絕塵俗却憶淮陰算計多  
陳倉刁斗喧空谷出不意備不及席卷中原無許力  
英雄不見空聞名玄猿月下啼山色今卽古古卽今  
行人怕聽斷腸音輸我胸中無所慮萍蹤江海儘浮  
沈

過樓煩寺有感

君不見五胡亂華綱紀裂君臣相啖如蛇蝎晉室翻

成累卵危奸雄竊保逞豪傑老與少弗忍道骨肉流  
離委荒草中國瓜分屬犬羊腥羶滿地將誰告仁與  
義咸廢棄七經二篇成故紙佳兵尚武殺氣驕直謂  
山河馬上治佛菩薩閱此輩鑄頑爲良慈雨沛谷隱  
龍飛紹佛圖樓煩豹變昭羣類隨方設化順機宐貴  
賤從風啓蒙昧姚秦石勒悟初心蒼生塗炭承茲濟  
又不見勝井金枝秀異常揚光將表醜醜瑞三草二  
木均受霑鼓聲那入闡提耳投鞭斷流狹長江強梁  
狼顧恣吞噬出師安公諫再三符堅伏軾佯瞋睡一  
朝兵散霸業空取笑千古真成戲飄風驟雨刁斗鳴



生民無奈樵蘇計廬山高五峰峻翠靄氤氳跌座穩  
五篇六事邁巢由天子潯陽詔不准貪夫懦夫聞此  
風孰不剛明消鄙吝利世從來功績高昌黎吉水猶  
猜忿烏紗巾天在上雌黃人品休鹵莽休鹵莽人禍  
天刑指諸掌我勸爾慢弄文凋淳損朴文爲君是非  
顛倒誠堪惜鸞鳳驅入鴟梟羣引後生祖輕薄短什  
豐章播唇舌大方君子自有見肯逐兒童營黑業習  
鑿齒劉遺民襄陽匡阜挹清芬片言一偈相酬唱流  
光足啓萬世昏邊風勁侵骨冷杖履翩翩尋勝井白  
草黃雲古殿寒遠公芳躅蕭條盡蓮華漏石棋枰東  
林白社空留名自慚小子道業疎坐觀成敗難支撐  
悲歌涕泗拽杖去滹沱滾滾愁堪聽

長歌送廬山黃龍潭湛上人遊學

并序

古人之志於學也學則必成今人雖志於學迄未  
有成者豈古今人知覺不同耶蓋古人之學也專



專而勤勤而恒恒而思思而明明而行於是六者  
斯須不敢怠也而其學成矣今子將遊學四方亦  
能於此六者持之有常則古人不遠聊贈以歌作  
長途主杖子

決戰從來貴拚死決學從來貴自強拚死臨敵心慷  
慨慷慨之者敵必亾自強不息學必成寧慮中途無  
主張所以古人志於學尋常臉上生水霜美惡境界  
付虛空不留方寸蔽心光心光不蔽慧自生慧生觸  
理無不明理明覽教自相契自然吐語佛智冥佛智  
既冥天有梯知君到此不生迷歸來高隱黃龍潭白

足蹈遍萬峰西相逢月下論疇昔始證予言無不寔  
無不寔也是無端太狼藉不是鎗旗惑亂人要銜儂  
家沒巴鼻

登天目徑山作

天上富貴人間慕人間富貴天上唾從來惟有達道  
人天上人間都覷破栗柳一條橫瘦肩窮山探水不  
知年兩九日月誰拋擲滄海桑田幾變遷君不見崑  
崙腹飛來浙江號天目一枝搖擺向東溟怒馬方馳  
忽頓伏雙徑縈迴雲霧深五峰盤踞星辰簇天所作  
地所藏待人而興名始揚欽師一受龍神施深湫漲



爲行道場道成德厚動天子王侯奔走爲金湯須信  
開池莫待月池成水滿月自光又不見幽岩樹歷盡  
嚴霜春未遇一日陽和驀地回嬌花嫩蘂紛相附自  
唐來至於今烟霞朝市幾浮沉何事東風撼塔鈴殘  
紅流水澹人心龍與蛇無常居山頭老漢八十餘夜  
叉佛面振家聲正令當陽肯讓渠白兔踪靈雞豕暖  
足功高報曉勇豈可人爲萬物靈逢緣不布菩提種  
放生池金蓮開異香時復染樓臺微風閒吹石上松  
定禪初驚聲若雷聲與色休妄測眼聞耳見不可卽  
兩者旣然法法同凡夫作佛無多力恠底歎郎業垢

昏青天白日生疑惑石解喝螺解活情與無情一機  
括試將輕線石下牽橫來豎去皆通達螺旣歿仍復  
生百沸鍋中別路行若人於此知消息劫火毘嵐一  
任烹且拈小喻其大了得頭頭本非昧前朝後代祖  
師禪善解施爲何利害趙州狗無佛性相逢舉着誰  
不病一朝徹底忽掀翻救却瞿曇窮性命一大事饒  
將相管取懸知弄不上非是欽師惑亂人情斷輸他  
本色匠子房謀淮陰功楚漢爭雄春夢中飛沙何處  
鳴刀斗醒來自笑兩成空遮空相元清淨無邊刹海  
虛明鏡一微涉動太山崩今古紛紛憎愛柄莫若早



直下休干頭萬緒付溪流明月溪邊趺坐時雲空臺  
殿自清秋嗟祖道轉荒涼狐兔成羣白日狂三衣瓦  
鉢是何物淫坊酒肆較低昂水山勝無過此絕頂纜  
登收衆美浙江濤接海門潮觀音舌相拖牀被六慧  
老慈悲好白雲却許紅裙掃遊人若恠烟花迷敢保  
先生未聞道迷在我不在人境緣順逆陷根塵迥脫  
根塵光獨露閒花野草大家春聊暫遊未能留阿誰  
追我雙溪頭孤燈達旦話疇昔臨別瓶窰情更稠丈  
夫脚肯閒踏蓮花藏板期永納分付山靈善護持萬  
古蒼生無畏塔

奴歌 并序

予聞萬物浮沉於生歿者情爲其累耳故未超情  
者解奴人而而不自奴何殊東施醜嫫母哉因而  
信口歌此

君不見蕭梁求爲佛家奴五體投地拜泥塗至今天  
下聚口笑誰知就裡存遠圖又不見張子房圯橋進  
履人呼狂少年不恥拜白頭強秦一旦爲之亡歿生  
於人亦大矣若比強秦難此彼不笑畱侯笑梁武西  
施貌惡嫫母美嗟世眼見何短是近非遠徒毀讚塵  
劫不憂憂頃刻緩者反急急者緩子房亡秦爲報韓



秦亡心事都已完超然且托赤松遊流水青山天地  
寬人生大患莫若身老子立言寧不真既悟此身爲  
大患忘身事佛豈凡民勸君夜氣清明時細將兩者  
較疎親蕭張所存志遠近何殊青天與黃塵衆人見  
小不見大蟻垤龍峰等一巾又不見眼爲色之奴耳  
爲聲之奴鼻爲香臭奴舌爲鹹酸奴身爲觸之奴意  
爲攀緣奴巢許爲名高之奴堯舜爲天下之奴老子  
爲三寶之奴孔氏爲仁義之奴釋迦爲衆生之奴達  
觀老漢爲沒巴鼻之奴長亦奴短亦奴美亦奴惡亦  
奴古亦奴今亦奴大道未判何爾汝凡落朕兆皆爲

奴嗟哉濁世顛復倒不奴於汝謂我奴辟如魚龍在  
水中分疆割界嚴異同殊不知離水覓魚龍魚龍何  
所從又如大地上培塿與崑崙離地辨高低瞎子笑  
盲人呵呵會也麼若知此可來同度苦海波

溧陽結夏歌

溧陽莊溧陽莊地廣天低野色蒼碧樹塵希晝作陰  
翠籐月上夜生光凭淨几對明窓飯罷喃喃讀竺章  
慧風颯爾卷迷雲一輪靈鑒照無方喜長夏荒林僻  
游子那能覓踪跡鉢水鑪香魂夢涼共誰箕踞恣幽  
適君不見寵辱陌患得患失驚俗骨華髮蕭蕭孰解



休等閒氣斷空悲泣兒與孫縱滿眼黃泉路上苦無  
限自家造罪自家當悔恨生前欠營善慈陰槐翠蛟  
軒培植構來知幾年從聞閣覆垂玉堂飛紅一片浮  
青天朝與暮勤功課鐵磬聲中亡者度右丞別墅改  
招提輞川千載王氏做嘆古今錯用心懶積白業積  
黃金滿頭雪色買難消歌舞樓臺變荆榛吳王墓齊  
王陵年年歲歲記空名金棺銀槨屬豪客行人弔古  
枉車停爭似聊城傅居士爲爺生子續傳燈

房山歌

房山奇勝天下寡羣峰梁棟青天瓦四圍翠壁鎖空  
明就中幽邃難圖寫行鳥路多恐怖挾策捫蘿防失  
悞禪流欲透死生關百尺竿頭須進步拚跌殺危機  
竭虎穴龍宮皆寂滅對境無心方寸閒懸崖跳躑須  
豪傑閻老子見此輩業鏡分明罪難配從來不落朕  
兆中鄧公碾折馬駒腿據尊卑明彼此丹霞燒佛亦  
合歎誰知禍着熱心人院主眉須甘墮耳冤不冤屈  
不屈生殺那論祖與佛驢糞相逢換眼睛夜光翻作  
路旁物君不見雲深處梵率鐘聲等刀鋸白拈老子  
解回互明暗相叅向誰語言不言知不知雲邊老樹  
礙人枝月夜幾回橫瘦影驅烏錯解作蛇兒行未里



頽滴瀝點點有聲何處覓一聲既爾萬聲同眼聽清  
音太古笛禪家樂調自朴不屬宮商辨清濁去聖遠  
兮邪見深紛紛魔子寧知覺笛既爾琴亦然子期于  
古卧黃泉料難拍手喚得起伯牙安忍再整絃高山  
上有流水一斗之名何代始曾聞大旱爲雲霓三草  
二木生悲喜一六合水可見未合已前浪更險若言  
龍去水卽枯性空真水成虛詭如是觀名正觀魔外  
從教心膽寒一大既然三大等事事同條莫自瞞頓  
悟了識轉智六七因中分等地觀門逆順痛自強年  
光宜惜莫虛棄補處尊相宗祖知足天中施法雨上

方臺殿信玲瓏龍象當年成隊伍寒岩下異草青纔  
說興亡不可聽空門尚復有消歇人代安能無朽榮  
漢高祖楚霸王山河百戰爭雌黃請看而今安在哉  
龍樓鳳閣草萊荒笑淮陰輸畱侯自成自敗誰之由  
只爲當頭一着差滿盤棋子未央收奇男兒不見快  
開眼却教婦人賣相逢多少稱英雄事到頭來皆納  
敗春夢曉聞啼鳥古往今來事多少昨夜東風過短  
墻殘紅滿地誰相眺初立表華嚴老法界精深試尋  
討前三可以學解知後一從來沒頭腦殃及兒孫卒  
未休天開林叟分青皂皮球道人強證明也是自起



還自倒房山好任行坐峰巒面面如花朵石磴蒼苔  
笑馬蹄冷看遊人攀鐵鎖上者上下者下流芳自古  
不可把老病不與人相期莫待臨時淚空洒因有身  
招寵辱因有心生好惡苦海茫茫難濟度直將兩者  
等乾城那怕房山路頭錯

兄伯歌

羊生虎犬生牛指鹿爲馬誰所尤大抵人情反復間  
波瀾未必喻能周勢所臨利所在血口論交心尚昧  
况復相酬杯酒中伊能便肯傾肝肺君不見有形大  
者惟天地包羅萬有纖不棄暑往寒來興與亾未嘗

有心爲軌則孔方兄勢耀伯威福年來甚輝赫骨肉  
相逢狹路中歟生榮辱恣所役孔夫子李老君釋迦  
文乾坤三老最超羣直得於今伎倆窮相看品坐淚  
紛紛青者黃白者黑直者枉今枉者直禮樂詩書過  
耳風五千十二乾蘆菔孔方伯勢耀兄英雄彼此互  
崢嶸證今作古古作今仰憑神力無不成自笑從來  
不安分淡視二兄如土糞同儕盡道且狗時賊受剛  
福情不近窮性命直甚錢東拋西擲信前緣寸衷苟  
有真機在頭上安能無青天雲山中風塵裏出處何  
曾有定軌土庶公侯一道看境緣逆順何悲喜言之



易行之難好惡關頭戰歲寒自心未了強磨礱到底  
情根未易拚破鉢盂折拄杖一息不來都棄放單單  
剝得臭尸骸從他蛆出爛如醬爛如醬銀椀金棺無  
兩樣南北山頭多墓田未灰誰非勢利匠吾所言大  
似正歌之恐犯伯兄病伯兄從此肯回光迷雲鑠破  
呈心鏡心鏡明便自信向來勢利真罪釁卽將此念  
擴充之伯兄直下俱堯舜又不見君子小人豈有常  
魔佛還同雪與湯雪消湯內重尋雪何殊石女覓爺  
娘這般話甚易曉未解爲緣人欲擾試看一念未生  
時日用身心奚大小忽頓悟子得母騰騰天性自相

厚灰生顛沛只如閒一段恩情無左右千古始千古  
未如我所說理方達若非我說別尋條從教佛也奉  
一喝

道吉水懷鄒郎

隔吉水兮望吉山吉山之下誰結庵庵前古道蒼苔  
滿獨許白雲閒往還

山居歌遺堯率寺隆禪人

山居春花木氤氳氣象新幽鳥一聲啼曉夢等閒喚  
醒本來人

山居夏雷雨龍蛇爭變化戶外階前雲水深禪人憨



臥長松下

山居秋石上裁雲補衲頭一任西風頻落葉園林芋  
栗已全收

山居冬雪覆千峰與萬峰茅屋夜深成獨坐地爐達  
旦暖烘烘

寄憨師觀音歌

石頭船艙大幾多我與公坐寬如何一別三年不相  
見幾曾離得上新河然無船主爲把柁普門尋得觀  
音哥觀音老哥我不異今寄觀音到廣城廣城亦不  
異船艙我公朝莫富歡情此情情在象帝先千磨萬

折觀音憐故特分身作三老長年爲公撐此船此船  
撐到安穩處何怕風波浪濈天浪濈天浪濈天寶船  
廠裏結因緣我聞南海寶最衆公載衆寶船滿乎船  
若不滿重相見觀音老哥意何如意何如意何如意  
峰海月明如鏡照破支郎不丈夫

龐德公歌

襄陽龐公少檢束白髮不髡亦不俗世所奔趨我獨  
棄我已餘彼不足鹿門有月樹下行虎溪無風舟  
上宿不識當時捕魚客但愛長康畫金粟杜口如今  
不復言龐公爲人不曲局東西有人問老翁爲道明



燈照華屋五言七言正見戲三行五行亦偶耳我性  
不飲只解醉正如春風弄羣卉四十年來同所事老  
去何須別愚智古人不住亦不滅我今不作亦不止  
寄與悠悠世上人浪生浪死一埃塵洗墨無池筆無  
塚聊以作戲悅吾爾

岷江歌

藍袍不服服緇袍身處塵誼慕寂寥山水移來杖藤  
上閒消那得白頭毛頭毛白雪覆層峰趣難得從教  
熱惱化清涼娑婆不異蓮華國但將憎愛付岷江龍  
堂寺裏龍初出龍初出千山萬山雲墨黑火星撞見

老比丘伎倆難施空自泣

古澗歌

直下千峰與萬峰山中一雨瀑千里流來深處湛然  
滿分出池平映遠空君不見源遠流長出處高終歸  
大海作波濤此言雖復尋常句得意忘言理水遙又  
不見言說法身無精麤忘言得意皆真如白雲重疊  
流水聲側耳聽來有若無自太宰與諸君麤言細語  
如蟲食木偶爾成文有心無心路既窮流水泠泠出  
白雲達觀道人健行脚海北天南遍摸索青山飽飯  
臥松下泉聲咽石催夢覺夢覺眼開天地寬寒暄何



處不安樂偶然乞食來荆楚淨業禪房竹几角禪人  
笑而示此卷兩耳泉聲洗煩濁橫疑身在烟霞中禪  
房何日誅茅縛溪聲果是廣長舌說法何勞口聒聒

髡丁歌

恣軟頑恣軟頑去聖遠今無羞顏髡丁六羣與七羣  
飽食遊談胡亂攀或攀佛或攀祖佛祖吾曹當踵武  
羊質虎皮徧諸方爲非往往煩官府官不知橫生疑  
玉石俱焚一同看遂謂緇林無靈芝三家村七里店  
善惡賢愚皆可驗檢名審實情難瞞善者賜香惡賜  
劍賞罰明奸莫逃難將黑白昧絲毫空門廣濶人烟

衆荆棘梧桐各有條鳳棲棘鴉聚梧桐自然精神  
殊莫因棲止眩毛色鴉豈能作鳳鳴乎佛知見貴戒  
律背則凶今奉則吉爲僧若不斷葷羶如來呼爲髡  
頭卒城市裏山林間名藍真宇指可頌相將十九廢  
七八疎山石門徒悲潛推所自廢寺由不因黃冠因  
髡頭髮頭若使守戒珠福田自然多秋收實相米飯  
如雪嚼破一顆狂心歇狂心歇處本菩提光還自照  
無圓缺僧如此孰不敬敬僧檀那心亦正僧俗心光  
照不窮疎山石門行正令正令行今神鬼泣當機佛  
祖難挽柄陳瑩中人中龍天台教觀有門融上藍長



老世英勘宗教精深覺範翁

登那羅窟有感

君不見太樸未鑿混沌始情與無情無彼此瞥然一念是誰生骨肉山河成礙窒那羅窟甚深密底裏空明不可測見說神僧向入中雲邊千古遺包笠聞其風我亦來幽岩感慨增徘徊自慚身見仍還在菩薩有門不爲開一直上莫分別凡聖都盧乾屎橛當頭若許着思量石人腦後重加楔由是觀休外參眼聲耳色觸體寒常光一片色非色乾坤攝取一毛端又不見維摩丈室十笏許百千師座皆容處若言老漢

弄神通分明瞋睡成錯去這妙用孰不有吃飯穿衣記得否自是男兒不丈夫超躡金毛變癡狗風吹草本非賊望影狺狺吠不已及乎大盜劫主人煩惱刀鳴遂竄匿業酒醉何日醒碌碌浮華俱醅酹輕裘肥馬送時光愁殺相知多此病且由他各管自沐猴性躁方痛治好惡關頭林木深上下何曾有定止鞭其後卽回首叱去呼來不敢扭掌中繩索尚相持禪翁謾笑狂奴醜明道易履道難習水情潭豈易乾不是一番拚命做說時似悟用時瞞話到此淚如雨滴滴皆從肝肺出相逢罕遇箇中人愁人莫向愁人語旣



有苦必有甜陰盡陽回峒口乾閒來暴背解麻衲寧  
知身在重巒間夜來趣忘人情萬里烟波海月生設  
使侯王知此境便教敝屣視功名

皮囊歌

惟哉四大誠吾患害孜孜給其所需念念從其所愛  
未嘗少頃而哀矜胡迺忘恩之莫大正欲策進于清  
虛反招增損於勤怠正欲忘彼於無何有之鄉不覺  
遷移於愛憎之態切而累父母匡扶長以藉師資教  
誠晝則役我如馬牛夜則昏我如蟲蠹登山兮氣喘  
神疲涉水兮足寒腰痠動時纔覺得其所宜轉眼以

成無能靜時方欲憇其幾微倏爾千條萬派我之恩  
德日隆汝之過德日敗從今識破這冤家任我縱橫  
俱自在或赴火或投崖終不爲汝生驚恠或中矢或  
嬰矛豈復還爲汝罣碍但願人人出此情何分九蓮  
及三界若還一念被他迷管取來生債業債

石門多勝閣啜茗問月歌

連宵明月在何處明月今宵始見汝我問明明月月伴  
龔清光湛湛嬌不語誰知不語意更深明月無心解  
相與海角天涯在在逢根塵迥脫月爲侶月明若使  
有盈虧拾得寒山肯輕許李白把酒問月明明月明石



門翻問予予無所答指溪山溪山明月常所處我心  
卽月月卽我我今月今謾寒暑盧仝七碗生清風予  
啜三甌問吳楚吳王楚子安在哉章臺餘艸夢空舉  
雪消巴蜀春水來羅峯龍團試重煮九爐湯沸學雷  
鳴凍壑一聲忘我所

臨川文昌橋水月歌

君不見文昌橋上月幾回圓今幾回缺月缺月圓非  
無心要知黑髮成白髮髮白若使不復黑無拘貴賤  
終埋骨金棺銀槨與籛條骨朽到頭總俱沒又不見  
文昌橋下水逝波一去不復返花開花落知幾遭流

水送花無近遠近送前川花自沈遠送東溟花始損  
雖分遠近皆殘紅樹底悲歌何太晚月今花今是何  
物盈虧榮落信還屈扣其兩端情自枯情枯自然智  
亦訖智訖情枯着眼觀月明流水如湯沸如湯沸文  
昌橋斷應黼黻黼黻文昌功最高津梁萬古何崎嶇  
何崎嶇利害關頭情貴拂情拂理通津梁成頭顱水  
底休悲鬱文昌橋上月明時法食徧拋無煩乞管教  
一飽忘百饑蠲醜夢覺心非佛

遊飛鰲峰悼羅近溪先生

雲峰如花公如春春歸花自少精神高山流水初不



異風月無邊欠主人主人一去不復返笑予何事來  
遊晚梅花落盡浪花浮片帆風飽來亦遠舟停山脚  
望山頭橋橫半空跨絕巘見說羅公橋上行仰看青  
天橋上偃身心已視等虛空虛空豈復有增損翻身  
橋上東復西下方人見驚不穩羅公浩歌行雲停聲  
滿乾坤誰復隱歌聲全落麻姑泉泉化爲酒解愁本  
愁本莫過利與名利名又以身爲鍵身忘患忘神始  
全神全風塵卽聞死何必雲深覓從姑却被麻姑笑  
凡混羅公心曲歌中剖摩利支天司北斗一身多臂  
手縱橫各執法物心豈有有心兩手勞不勝無心千

手妙自偶羅公此妙孰能傳能傳問君有受否有受  
心外則有法根塵亢然神復禿身心翻作是非巢利  
名烏雀爭好醜鷓鴣一枝身以安肯學烏鴉開惡口  
惡口不開善口開開言終與理不乖橫說豎說萬竅  
號天風寧出有心哉無心根塵何彼此如去如來莫  
亂猜羅公此意得無得暗將無得化春雷春雷出地  
羣蟄醒醒後三家夢自回君不見儒釋老三家兒孫  
橫煩惱羅公一笑如春風無明椿子都吹倒盱江三  
月放桃花兩岸紅顏知多少莫道羅公去不歸雲峰  
古路無人掃



悟道歌 并序

古人謂悟道難予甚不然特作歌聊泄微意

君不見牛與馬只愛憨眠不愛打草肥水美情更歡  
蹄角饑焦難可惹水中魚樹上鳥一樣飛潛無大小  
慕潭擇木最難瞞駭鴛鴦鈎太分曉又不見上達輕  
軒冕雲壑松泉苦耽酒空谷幽蘭獨自香終須不逐  
清風卷惟中人甘縉紳聲色遊觀意氣新瓊林宴罷  
喝如雷帶酒歸來燭已陳田家苦田家樂苦樂浮沈  
任豐約最是西風晚稻香濁醪肥鴨對斟酌南枝鵲  
瀚海羊蘇武當年冷獨嘗馬市開來三十年破虜將

軍齒盡黃人與物殊階級喜則揚聲悲則泣莫言人  
貴物賤後一念未生皆獨立性所變乃爲情憎愛交  
加理不清須知想念卽本智覓水離冰佛豈成臨濟  
捧德山喝馬面牛頭手段辣土庶公侯隻眼看是凡  
是聖從宰割這些子真妙術掃却迷雲懸慧日大家  
都在清光中盲者依然黑漆漆再方便開覺路內外  
推尋心無住無住之心物我同熾然成異因喜怒哀  
怒起初無性離却前塵沒把柄智者頓達能所空迸  
出軒轅太古鏡等閒用處辨妍媸斷送瞿曇窮性命  
悟道易難在人人而果敢冬可春孟宗哭竹笋爲抽



蛇奴雖鈍亦登真滿天下老和尚一片舌頭橫贊謗  
一千七百葛藤窩都將截斷隨風颺喫飯穿衣誰不  
能死生榮辱奚欣愴荒墳見鬼不生疑便是金毛師  
子樣

### 棕履歌

破棕履聊相贖蹈遍千崖與萬仞試看脚尖未舉時  
聖凡側耳雷電迅勤警策勿懈困好把年光惜分寸  
塞北邊南往返勞不明大事千生恨又不見老達磨  
手持隻履過寒岫嶺頭相見果是真熊耳開棺事更  
訛何如老漢這棕鞋浪跡雲山與薜蘿直饒大悲千  
手眼管教摸索火中波又一事謾再卜來去如毬轉  
輓輓東村大伯最相知幾回正笑翻成哭妄念起不  
須覺信步茫茫最真朴若離大地覓脚根何殊離石  
求其璞誠實語若斟酌失却木梳問鋤耬向上程途  
有路行賺煞呆郎自擔閣

### 登徑山歌

紫栢老紫栢老一枝筇杖探奇奧但除中國未經封  
勝水佳山無不到惟此山未嘗攀春來絕頂叩禪關  
五峰盤踞諸天上雙徑榮廻萬壑間唐國一號初祖  
芟茅剪棘開茲土燈傳終古慧光寒龍象繩繩爭步



武這擔板不可縮是聖是凡一切刻直饒劍刃解翻身早被儂家笑杜撰法王孫喻鸞鳳豈逐山雞閒打  
閔羊角風高十萬里世間榮辱誰能控朝出將暮入  
相一息不來皆莫仗拆天勳業目前雲罪過閻羅肯  
輕放君不見留侯揮臂入千峰不事君王事赤松不  
是好花開未遍等閒臺殿起秋風

虎丘圖

海湧崔嵬高入雲青松白石遠塵紛烟蘿深處前朝  
寺鐘磬風清時忽聞我曾投策禮大覺殿堂金壁光  
輝發誰將龍腦焚寶爐香雲繚繞沾摩訶今日君家

見此圖當年勝事宛如昨人生韶華能幾何常年行  
樂不爲多君不見吳王盛時強已極觀兵中國誰敢  
逆黃池敗闕歸來遲吳門山川帶羞色英雄夢在瞬  
息平地官花變荆棘劍池今已屬遊人惟有魚腸伴  
枯骨又不見勾踐得意渡錢塘如花吳女滿舟航蛟  
龍欲得不敢奪越王載之還故鄉只今會稽仍復在  
竹箭蕭蕭變人代吳王盛越王衰越王盛時吳王敗  
吳越雌雄夢一場業魂千古償冤債前車既覆後車  
鑒一念回光復不遠雖然大小不同倫由來有理不  
隔線我作此歌有深意順逆關頭君却記吳越爭鋒



尚已非儂家那復爭閒氣澹泊勤勞是本行精深內  
典明心志從他面面鼓風波一炷清香答天地消遣  
春光展此圖虎丘移入書堂裏

題某公禪房歌

羨公所居今高曠而遠塵機重岩間寂兮麋鹿同棲  
遲白雲抱幽石今未可以有無知明月留清泉今豈  
可以去來期雪竇撫髀今薦此機者稀余拽杖出山  
兮孤松芳蘭牽所思牽所思兮在離微離則不可言  
說求微則不可心想推既不可求推今天地一指萬  
物一馬渠卽是我我卽伊我卽伊兮何所思

看花歌

看花來看花來花開花落幾多迴人間富貴亦如此  
看花幾箇心花開心花開色本空從來富貴花在風  
風中艷冶與馨色兔角龜毛豈不同眼見色耳聞聲  
聲色場頭多愛憎榮卽喜兮辱卽悲茫茫苦海岸難  
登看花好看花好寒暑相催人易老從今熱惱化清  
涼莫使清涼來熱惱花卽心意最深相逢幾箇是知  
音文殊隊裏解翻身塵塵剎剎皆黃金花障眼眼生  
花分明本是却成差境緣好醜心外無天上人間一  
朶花看花去看花去凡聖有無切莫住從來花相權



最奇既解放開又捏聚問君把柄憑誰力看花歌意  
休輕舉

贈戴升之

君不見戴郎短小膽氣豪不畏岷江濤不畏廬山高  
傲然駕孤蓬意思何飄飄輕截蛟龍窟閉尋虎豹巢  
長松之下拜老衲老衲無印佩瘦腰戴郎所爲爲何  
事敢挹玄津滋靈苗靈苗一抽千萬丈天風忽起摩  
重霄見說稻花香十虛金湯大法安辭勞又不見戴  
郎裘敝黃金盡衆人相逢無不哂誰知屈乃伸之機  
頭角崢嶸待雷震泥蟠設無冲天志丈夫雖生何異

死又不見勾

嘗膽孟明拜賜心不反破釜

焚舟決一戰晉人堅守出不敢戴郎別我將十年鬢  
毛相見驚蒼然精神不似觀河時負車猶困羊腸巔  
自慚本是解空叟不覺飲泣獨良久青春古道不再  
來戴郎此去莫甘朽廬山山色鎮長青岷江江濤鎮  
長吼焰光一朝燒杏花三尺烏紗也不醜再來五老  
望番湖莫言心事今朝剖



紫柏大師集跋

自法席久塵祖燈無焰求其擔  
荷大法振揚宗風摧情魔于百  
戰枯識海於千流我  
明自楚石以後

紫柏大師一人而已大師洞徹自



心皎々孤映語言文字從心光中  
自然溢出一經拈指本妙見前  
至其慈悲熱腸淋漓痛切無非  
欲學人積劫無明當下冰銷寃  
此一大事因緣耳噫初祖不立  
文字直指人心大師不離文字

亦指人心其揆一也煨嘗見侍者  
握管旁立大師衝口而出侍者  
奮腕疾書猶苦不給一紙既盈  
漫易一紙如泉噴地琅々不傳自  
非見地圓明了無疑滯曷至此  
乎噫有文字有未始有文字學



者繇文字悟未始有文字則妙  
膳上味人々充滿如但作文字會  
也何異指饌說飽豈療朽虛雖  
然凡心未鑄聖解難窺且請于  
大師日用着眼集中拈出毘舍  
浮佛一頌謂包括大藏透徹禪

源持此凡十五寒暑而精虔不  
休自云每觸逆順愛憎之境必  
以此頌為前茅覆軍殺將亦  
不知其幾矣噫了徹如師而猶  
堅銳猛決若此此所以孤風絕  
侶佛意祖髓在々逢源也即晚



寄園中洒然夷適死生利害如  
撼空虛照用之妙前齊古德  
矣夫人：本有心光不知照用以  
致墜失而大師慈憐迫切代為  
指授片語單詞皆拭垢還光之  
助於此逗得消息方是紫柏

兒孫至利根男子畧沾涓滴立見  
風湧雲蒸騰驟變化超然默契  
迥絕意言即一部語錄無隻字  
可以矣亦菴先生數載討論獨  
任流布使紫柏心光如日華月  
彩注射千古先生之光豈不交



映互攝融成一片乎

弟子賀煥熏沐拜書





